

VEDTEKTER FOR VESTLAND VENSTRE 2021

Nynorsk versjon av normalvedtekter for fylkes- og regionlag av Venstre

- Sist endra av fylkesårsmøtet 13. februar 2021. Godkjent av Sentralstyret 4. februar 2022 -

§ 1. FORMÅL

Formålet til Vestland Venstre er å arbeide aktivt for Venstre sine saker i fylket i samsvar med Venstre sine hovudvedtekter og Venstre sitt program.

§ 2. MEDLEMSKAP

Personar over 15 år som ikkje er medlem i noko anna parti, og som deler Venstre sitt grunnsyn, kan bli medlem av Venstre.

Medlemskap får ein frå det tidspunkt ein melder seg inn. Medlemsrettane oppstår når kontingent er betalt.

Samla kontingent vert fastsett av Venstre sitt landsmøte og gjeld også Vestland Venstre. Vestland Venstre kan rapportere inn tilleggskontingent etter vedtak på årsmøtet. Landsmøtet fastset kven som har rett til redusert kontingent.

Medlemskap, og dei rettar medlemskap gjev, får ein berre i eitt lokallag, og medlemmen kan berre vere med å behandle og stemme over same sak i eitt lokallag. Det einskilde medlem kan sjølv velje kva lokallag ein vil vere medlem i.

Rettar som medlem kan berre utøvast personleg.

§ 3. ORGANISASJON

Venstre består av partiet sine medlemmer organisert gjennom lokallag, fylkeslag og partiet sin nasjonale organisasjon.

Venstre sine partiorgan i fylka er fylkesstyret og fylkesårsmøtet.

Vestland Venstre har følgjande tilknytte sjølvstendige og likestilte organisasjonar som er representert i Vestland Venstre sine organ og omtalt i desse vedtekter dersom organisasjonane er aktive: Vestland Unge Venstre, Vestland Liberale studentar og Vestland Venstrekvinnelag. Vestland Venstre er tilknytt Venstres Studieforbund (VS).

Begge kjønn skal, som ein hovudregel, vere representert med minst 40 prosent i Vestland Venstre sine styre, utval, komitéar og delegasjonar til Venstre sine landsmøte.

Folkevald for Vestland Venstre blir ein berre ved å stille til val på Vestland Venstre sine vallister og på Venstre sitt program. Har ein stilt til val på Vestland Venstre sitt program så er dette den kontrakten ein har med veljarane.

Vestland Venstre sine partiorgan kan ikkje instruere folkevalde som er innvalde for Vestland Venstre utover det programmet dei er valde på. Dersom det er punkt i eit partiprogram ein folkevald ikkje kan følgje, er den folkevalde forplikta til å informere vedtaksorganet om dette.

Vestland Venstre sine folkevalde representantar pliktar å skape gode politiske prosessar og lytte til innspel frå eige parti.

Vestland Venstre sine folkevalde representantar i fylkestinget dannar si eiga gruppe med styre og gruppereglement.

Protokollar

Møteprotokollar frå fylkeslaget vert sendt til alle som er innkalla til møta og til Venstres Hovudorganisasjon.

Voteringsreglar i fylkeslaget

Møteleiaren foreslår korleis voteringane skal gå føre seg. Vedtak i andre saker enn dei som gjeld vedtektsendringar gjerast med fleirtalsvedtak. Dersom stemmetala for og mot i ei sak er like vert det ei ny votering. Ved andre gongs stemmelikskap blir innstillinga ståande.

Ved personval og nominasjonar krevst over halvparten av dei gjevne stemmene for å bli vald. Oppnår ein ikkje dette ved første gongs votering, fell den av kandidatane med færrest stemmer ut. Det vert gjennomført nye valomgangar inntil éin av kandidatane har fått over halvparten av dei gjevne stemmer. Ved stemmelikskap gjer ein ny votering. Ved andre gongs stemmelikskap vert det loddtrekking.

Dersom resultatet ved andre former for personval blir likt stemmetall, skal det gjennomførast loddtrekking.

Personval skal vere skriftleg dersom minst éin person krev det. Stemmesetlar ved val skal innehalde det same tal namn som det tal personar som skal veljast.

§ 4. FYLKESSTYRET

Fylkesstyret leiar Venstre sitt arbeid mellom fylkesårsmøta i samsvar med vedtektene og dei vedtak som blir fatta av fylkesårsmøtet. Fylkesstyret møtest minst fire gonger mellom kvart ordinære fylkesårsmøte og elles så ofte som leiaren eller 40 % av fylkesstyremedlemmene skriftleg krev det. Fylkesstyret kan gjere vedtak når minst halvparten av fylkesstyremedlemmene, deriblant fylkesleiaren eller ein av nestleiarane, er til stades.

Fylkesleiaren kallar fylkesstyret saman og leiar møta. Fylkesstyremøta er i utgangspunktet opne.

Fylkesstyret består av fylkesleiar og minst fire fylkesstyremedlemmer vald av fylkesårsmøtet. I tillegg har styret eit medlem vald av Vestland Unge Venstre, eit medlem vald av Vestland Liberale studentar, eit medlem vald av Vestland Venstrekvinnelag og eventuelt medlemmer vald av andre sideorganisasjonar i Vestland. Det er ein føresetnad for representasjonsretten at den tilknytta organisasjon har avhalde årsmøte same år som fylkesårsmøtet eller året før dette. Leiaren for Venstre si fylkestingsgruppe tiltrer styret utan stemmerett.

Fylkesstyret pliktar å følgje opp vedtektene og har ansvar for fylkeslaget sin økonomi, nettsider, politikkskaping, informasjonsverksemd, skoloring, medlemsverving og ekstern verksemd. Fylkesleiar teiknar for laget.

Fylkesstyret kan oppnemne eigne utval og komitéar til å ta seg av særskilte oppgåver, som for eksempel valkamputval, skoleringsutval, programkomité og nominasjonskomité. Tilknytte, aktive sideorganisasjonar i fylket har rett på ein representant kvar i desse utvala. Dei nemnder/utval som fylkesstyret oppnemner skal fortrinnsvis skal ha ei samansetting med oddetal. Om nemnda/utvalet endar opp med eit partal av medlemmer, så skal utvalsleiar ha avgjerande dobbeltstemme ved stemmelikskap.

Fylkesstyret har ansvar for å stifte nye lokallag og å følgje opp dei eksisterande lokallaga sitt arbeid. Vidare skal fylkesstyret bidra til at det vert utarbeidd lokale valprogram og at det vert stilt vallister for Venstre i alle kommunar i fylket.

Fylkesstyret skal i mellomvalsår før stortings- og fylkestingsval sette i gang ein open nominasjonsprosess og sørge for at nominasjonsmøtet vert halde innan utgangen av februar (i valåret).

I fylkestingsvalår sørger fylkesstyret for at det vert oppnemnt ein programkomité som i god tid før fylkesårsmøtet skal utarbeide eit forslag til eige valprogram for Venstre i fylket.

Etter eit fylkestingsval kallar fylkesstyret inn dei representantane som har blitt folkevald for Venstre i fylkestinget til konstituerande møte, men dei folkevalde konstituerer seg sjølv og vel sin gruppeleiar.

Fylkesstyret kan oppnemne eit arbeidsutval som førebur saker til handsaming i fylkesstyret og følgjer opp vedtak fatta av fylkesstyret. Arbeidsutvalet skal ha eit klart mandat som vert vedteke av fylkesstyret. Arbeidsutvalet består av leiaren og to medlemmer vald av og blant fylkesstyremedlemmene. Protokoll frå arbeidsutvalet sine forhandlingar skal sendast til fylkesstyret sine medlemmer og varamedlemmer. Merknader til protokollen må leggast fram seinast på neste fylkesstyremøte.

§ 5. FYLKESÅRSMØTET

Fylkesårsmøtet er høgaste myndigheit i fylkeslaget og skal haldast innan utgangen av februar kvart år. Fylkesstyret kallar inn til møtet med minst ein månads varsel. I innkallinga skal det setjast ein frist for påmelding og for å fremme forslag til politiske uttalar og andre forslag ein ønskjer å ta opp til handsaming på fylkesårsmøtet. Fylkesårsmøtet skal berre behandle dei saker som er sett opp på sakslista for møtet.

Ekstraordinært fylkesårsmøte kan haldast når fylkesstyret vedtek det eller når minst ein tredel av lokallaga skriftleg krev det. Ekstraordinært årsmøte kan berre behandle den eller dei saker som er gitt i innkallinga til møtet.

Tid og stad vert fastsett av fylkesstyret. Møtet skal innkallast med minst 10 dagars varsel.

Dei valde delegatane til det ordinære årsmøtet er delegatar til det ekstraordinære.

Saksdokument skal sendast lokallag/påmeldte delegatar minst 7 dagar før årsmøtet. Innkomne forslag som kjem inn etter den fastsette fristen må få 2/3 fleirtal på fylkesårsmøtet for å bli tatt opp til behandling på fylkesårsmøtet.

Fylkesårsmøtet består av fylkesstyret sine årsmøtevalde medlemmer og av delegatar vald av lokallagsårsmøta i Venstre etter følgjande reglar:

a) Tal på medlemmer i lokallaga:

Inntil 25 medlemmer: 1 delegat

26-50 medlemmer: 2 delegatar

51-100 medlemmer: 3 delegatar

Vidare 1 delegat for kvar påbegynt 50 medlemmer.

og

b) Stemmetal i den enkelte kommune ved siste halde val i fylket:

Inntil 150 stemmer: 1 delegat

For overskytande tal inntil 1.900; ein delegat for kvar påbegynt 250

For overskytande tal inntil 7.900; ein delegat for kvar påbegynt 400

For ytterlegare overskytande tal; ein delegat for kvar påbegynt 700

Medlemstalet vert rekna per 31. desember og berre betalande medlemmer reknast med.

I kommunar utan lokallag, men der det er gitt stemmer for Venstre ved valet, tar

fylkesårsmøtet stilling til kven som kan representere kommunen på grunnlag av stemmetal. Delegatar frå lokallag skal ha fullmakter underskrivne av leiar i lokallaget.

Derneft har dei tilknytta organisasjonane Vestland Unge Venstre, Vestland Liberale studentar og Vestland Venstrekvinnelag, i tillegg til sin styrerepresentant, rett på representasjon etter tal medlemmar per 31.12.:

Inntil 25 medlemmer: 1 delegat

26-50 medlemmer: 2 delegatar

51-100 medlemmer: 3 delegatar

Vidare 1 delegat for kvar påbegynt 50 medlemmer.

Det er ein føresetnad for representasjonsretten at laga har halde årsmøte same år som fylkesårsmøtet eller året før dette.

Venstre sine fylkestingsrepresentantar, stortingsrepresentantar frå fylket og statsrådar frå fylket har tale- og forslagsrett på fylkesårsmøta.

Fylkesårsmøtet er i utgangspunktet eit ope møte.

Konstituering

Fylkesårsmøtet vert opna av fylkesleiaren som leiar konstitueringa av møtet der følgjande skal veljast:

- Møteleiarar
- Fullmaktskomité med leiar og to medlemmer som gir innstilling om godkjenning av delegatane sine fullmakter til fylkesårsmøtet.
- Møtesekretærar og -referentar.
- Teljekorps.
- Redaksjonskomité for politiske uttaler.
- To personar til å underskrive protokollen.

Protokollen skal vere underskriven og tilgjengeleg seinast éin månad etter fylkesårsmøtet. Endeleg godkjenning av protokollen skjer i det første fylkesstyremøtet etter fylkesårsmøtet.

Val

Fylkesårsmøtet skal foreta val av:

Fylkesstyre

Det første og det tredje ordinære fylkesårsmøtet i stortingsperioden vel eit styre med minst 5 medlemmer, der det skal vere:

- Fylkesleiar
- Éin eller to fylkesnestleiarar
- Minst to eller tre fylkesstyremedlemmer
- Inntil 5 varamedlemmer

Revisor

Det første og tredje ordinære fylkesårsmøtet i stortingsperioden vel revisorar til å stå for revisjon av fylkeslaget sin rekneskap. Revisorane kan ikkje ha andre verv i fylkeslaget.

Landsmøtedelegatar

Kvart fylkesårsmøte vel delegatar og varadelegatar til landsmøtet i Venstre i tråd med tildelt tal på utsendingar.

Valkomité

Det andre og det fjerde ordinære fylkesårsmøtet i stortingsperioden vel ein valkomité etter forslag frå fylkesstyret. Komiteen består av leiar, to eller 4 medlemmer og fire

varamedlemmer, som på det etterfølgjande fylkesårsmøtet legg fram forslag til val av fylkesstyre, revisor og delegatar til landsmøte i Venstre. Ingen av medlemmene eller varamedlemmene i det sittande fylkesstyre kan vere medlemmer eller varamedlemmer til valkomitéen.

Andre arbeidsoppgåver

Alle ordinære fylkesårsmøte skal:

- Behandle årsmelding og årsrekneskap frå fylkesstyret. Årsmeldinga og årsrekneskapen følgjer kalenderåret.
- Fastsette fylkeslaget sin sats for medlemskontingent for det etterfølgjande kalenderår.
- Behandle forslag til mål, strategiar og hovudretningslinjer for fylkeslagets verksemd frå fylkesstyret.
- Behandle og stemme over andre saker som er fremma i samsvar med vedtektene.
- I stortingsvalår skal fylkesårsmøtet behandle og eventuelt fremme endringsforslag til utkast til stortingsvalprogram.
- I valår skal fylkesårsmøtet behandle og vedta ein plan for fylkeslaget sin valkamp.
- I fylkestingsvalår skal fylkesårsmøtet (eller etter vedtektene for det enkelte fylkeslag eit anna representativt møte i fylkeslaget) behandle og vedta eige valprogram for Venstre i fylket.

§ 6. NOMINASJON

Nominasjonsmøtet er samansett og har same representasjon som fylkesårsmøtet.

For fylkeslag som vel å halde nominasjonsmøtet i november eller desember året før val, skal det takast utgangspunkt i medlemstalet per 1. november same år som nominasjonsmøtet vert halde.

Nominasjonsmøtet vert konstituert på same måte som fylkesårsmøtet.

Val av delegatar frå lokallaga skjer på lokallagsårsmøte eller eige medlemsmøte i det enkelte lokallag. Slikt lokalt medlemsmøte skal kallast inn med 14 dagars varsel gjennom skriftleg invitasjon til alle medlemmer i lokallaget.

§ 7. ENDRINGAR I VEDTEKTENE

Ved endring av desse normalvedtektene må fylkeslaget behandle sine eigne vedtektssett på påfølgjande fylkesårsmøte.

Fylkeslaget sine vedtekter vert endra av fylkesårsmøtet når minst to tredeler stemmer for det. Forslag til vedtektsendringar skal på førehand leggjast fram for fylkesstyret og sendast ut seinast innan ein månad før fylkesårsmøtet til dei tilknytte organisasjonar sine fylkesstyre og Venstre sine lokallag i fylket. Før endringane trer i kraft må dei vere godkjent av sentralstyret i Venstres. Eit eventuelt avslag på godkjenning i sentralstyret kan ankast til landsstyret.

§ 8. SAMANSLÅING

Fylkeslaget kan slå seg saman med eitt eller fleire fylkeslag til éin organisasjon ved 2/3-flertal og elles etter nærmare føresegner i VHO sine vedtekter. Eit slikt regionlag må i vedtektene ivareta de organisatoriske løysningar som er nødvendige i forhold til oppgåvene knytt til nominasjon og innlevering av lister til fylkestingsval og stortingsval. Berre medlemmer som har røysterett i det enkelte fylke kan vere med å setje saman lista for dette fylket.